



Ina buna structura da vegliadetgna ei impurtonta enteifer ina populaziun da camutschs.



Localmein caschuna la tschoccadad da camutschs adina puspei grondas sperditas d'animals.

La digren da camutschs ha plirs motivs

Da 1994 entochen 2015 ei il diember da camutschs sittai en Svizra sereducius da struschamein 20 000 sin 11 650 tocs

DA HANS HUONDER / ANR

■ Il diember da camutschs ei sereducius ils davos onns cuntinuadamein. Quei ei buca mo il cass el Grischun ed en Svizra, mobein era ellas Alps dall'Austria, Frontscha, Slovenia ed Italia. CatschaSvizra e la conferenza dils administraturs da catscha e pesca dils cantuns han elavurau ina brochura ed in pupi da lavur cun mesiras per promover il camutsch il proxims onns. Pli baul entscheveva in discuors denter catschadurs cun la damonda: «Has sittau ina tscharva?». Oz ei quei auter: «Eis vegnius da sittaa la caura-camutsch?» Tgi che ha persequitau ils davos onns il svilup dallas populaziuns da camutschs ha stuiu constatar ina reducziun en biars loghens. Quella ei buca mo claramein veseivla ellas statisticas, mobein era el liug: Ella muntogna, la patria da quei animal fascinont. Ils davos onns ein organs dalla catscha, experts ed uniuns da catschadurs sefatschentai repetidamein dil fenomen che pertucca la reducziun dils camutschs. Differents simposis – era internaziunals – ein vegni organisai. «En discuors cun gliued d'altres tiaras constatein nus ch'ils problems ein ils medems», di David Clavadetscher, dapi l'entschatta 2013 meinafatschenta da CatschaSvizra, l'organisaziun tetgala dils catschadurs svizzers. Ella sefatschenta medemamein dalla problematica dil camutsch. Communablamein cun la conferenza dils administraturs da catscha e pesca dils cantuns ha ella elavurau in pupi da lavur ed ina brochura che tematisescha la reducziun dallas populaziuns da camutschs en Svizra.

Plirs facturs

La populaziun dils camutschs ellas tiaras dallas Alps dumbra rodond 440 000 tocs, da quei rodond 90 000 en Svizra. Da 1994 entochen 2015 ei il diember da camutschs sittai en Svizra sereducius da strusch 20 000 sin 11 650 tocs. El cantun Grischun quenta igl uffeci da catscha e pesca



Il camutsch ei buca mo sut squetsch da catscha, mobein era pertuccaus pli e pli dallas activitads dil temps liber dil carstgaun, la concorrenza dil spazi da viver entras tscharvas e capricorns sco era ella mira dil luf-tscherver.

cun ina populaziun da rodond 24 000 camutschs la primavera. Mo era cheu semuossa la reducziun ellas cefras dalla catscha. Igl onn 1997 ei aunc vegniu sittau biebein 4000 tocs, ils onns 2014 entochen 2016 mintgamai rodond 3000. Ina semeglianta reducziun vegn era constatada ellas autras tiaras. Sco quei ch'ils partenaris dalla brochura scrivon ein differents facturs responsabls per la reducziun dallas populaziuns da camutschs. Dad ina vart ei quei la catscha. «Els territoris cun catscha ei il squetsch da catscha savens il factur decisiv», di Clavadetscher. La catscha ei il factur ch'ei influenzabel directamein entras la planisaziun dalla catscha: «Nus consta-

tein denton ch'ei dat ina reducziun da camutschs era en loghens senza catscha. Quei muossa che la catscha ei buc il sulet factur relevant en quei connex.» In ulteriur factur ei la qualitat dil spazi da viver che vegn influenzau da stregns unviarns ni era dalla midada dil clima a liunga vosta. Las activitads el temps liber dil carstgaun ein s'augmentadas considerablamein ils davos onns e pertuccan era ils loghens da refugi dils camutschs. Talas activitads mettan sut squetsch ils camutschs. Leutier – aschia las informaziuns ella brochura – vegn la concorrenza da nuorsas buca pertgiradas ellas alps ni era dalla tscharva e dil capricorn. Gest igl unviern

nezegian quellas specias dalla selvaschina il medem spazi da viver e cheutras sedat ina concorrenza. Ils auturs dalla brochura numnan denton era ils animals da rapina grondas: «Ina rolla essenziala gioga il luf-tscherver en quei connex. Gest ils camutschs egl uaul ein perclitai dad el. Quei ei denton in factur local.» Probabel – e quei ei buca scret explicitamein ella brochura – contribuescha era il tschess alla reducziun da camutschs. La finfinala han era malsognas giu consequenzas negativas ils davos onns sils camutschs, surtut la tschoccadad da camutschs. Quei problem ei punctuals, mirau sur l'entira Svizra ei quei factur plitost sutordinaus.

Mesiras ein necessarias

Per catar soluziuns cuntentiveilas per la promozion dallas populaziuns da camutschs ei in process interdisciplinar necessaris. Facturs pertuccont la catscha, ils fatgs biologics ni era ecologics, culturals ed economic ston vegnir risguardai en quei connex. Per saver francar ils criteris dallas mesiras ein bunas datas davart ils effectivs necessarias, denter auter pertuccont la structura da vegliadetgna e sociala dils animals ni era la rata da reproducziun. Per contonscher datas aschi correctas sco pusseivel eis ei necessari da parter ils territoris en areals da surveglionza analog alla structura ch'il cantun Grischun ha. Rimnar datas ei denton mo ina part da quella lavur necessaria, l'autra ein controllas dil success, mesiras a cuorta e liunga vosta. «La finamira da promover las populaziuns dils camutschs che nus havein fixau ston succeder a liunga vosta. Gest tiels camutschs ha ei num haver pazienza. La rata da reproducziun ei pintga, leutier ein ils animals relativ tard ella vegliadetgna per la reproducziun. Tiel camutsch va ei rodond diesch onns avon ch'ins senta in effect persistent da mesiras», declara Clavadetscher. Il pachet da mesiras pertucca ton dapli savida sin fundament da datas, ina planisaziun flexibla e fundada dalla catscha da camutschs cun risguard dallas cundiziuns

actualas, localas e regionalas, la promtadad dils catschadurs per adattaziuns dalla planisaziun dalla catscha sco era recaltgar enconuschentschas davart ils facturs exacts che pertuccan la reducziun dallas populaziuns dils camutschs. Leutier fa ei denton era da basegn da reducir il disturbi dils camutschs entras las activitads dils carstgauns el temps liber – oravontut igl unviern – sco era entras animals da casa che pasculeschan nuncontrolladamein ellas alps. Gest pil temps d'unviern duein zonas da ruas survir al camutsch che ston denton era vegnir controlladas consequentamein. Medemamein duein ils catschadurs prestar lavur d'informaziun pertuccont la problematica che setschenta en connex culs camutschs. Ina mesira pusseivla ei era ina regulaziun da luf-tscherver a mesa vosta en loghens cun ina digren da camutschs. «Quellas mesiras ston tuttas vegnir regladas entras ils uffecis da catscha dils cantuns. La confederaziun sezza ha sulettamein la pusseviltad da decretar directivas sin fundament dalla basa legala», di Clavadetscher. CatschaSvizra e la conferenza dils administraturs da catscha dils cantuns ein responsabls per la controlla dallas mesiras instradadas. «Igl ei impurtont ch'ils pertuccai stettien en contact in cun l'auter e brattien ora las experientschas fatgas», puntuescha Clavadetscher.

Claras finamiras

La finamira da quei project ei da procurar che las populaziuns da camutschs en Svizra segiein saunas, hagian ina buna structura da vegliadetgna e sociala ch'ei adattada al spazi da viver. Il spazi da viver dils camutschs duei esser intact e buca restrenschius entras activitads dil carstgaun. Cheutras duei vegnir garantiu ina catscha da camutschs persistente ed a liunga vosta en Svizra. Cul pupi da posiziun duei vegnir fatg ina punt denter catschadurs, planisaders dalla catscha e biologs dalla selvaschina. Cheutras duei era la confidanza videnceivla vegnir rinforzada.



Pli e pli sto il camutsch parter siu spazi da viver cun capricorns e tscharvas. Cheutras vegn el sut squetsch.

FOTOS E. MONN/G.-A. HUONDER



Gest igl unviern drova la selvaschina ruas. Vegn ella disturbada sto ella consumar energia che sa la finfinala menar alla mort.